

**Date –02/09/2026**

**Time - 7:30 -7:40 Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- 1. Serlui bial chhunga khaw pahnih North Chawnpui leh Saihapui ‘K’ te chu tuilian avangin buaina an tawk mek a, tuiin a chim khuaa cheng te hmun himah thiar chhuah an ni.
- 2. UD&PA Minister Pu K. Sapdanga’n Mizoram sawrkar leh LMC thawhho that a pawimawh thu sawiin LMC hnathawh chu chhuanawm atih thu a sawi.
- 3. Supreme Court chuan NEET paper putru duhloha July ni 20 atanga 25 inkara zirlaiten lungawilohna an lantir tuma FIR thehluh zawng zawngte titawp turin thupek a chhuah.
- 4. Prime Minister Narendra Modia chuan hlawhtling taka Uzebkistan leh Kyrgyzstan a tlawh hnuah nizan khan India-ah a lo thleng leh tawh.

<><><>

**RAIN HAVOC**

Serlui bial chhunga khaw pahnih North Chawnpui leh Saihapui ‘K’ te chu tuilian avangin buaina an tawk mek a, tuiin a chim khuaa cheng te hmun himah thiar chhuah an ni.

Serlui B Hydel project tuikhuah chu ruahtui tam avangin a chim chin sang zelin North Chawnpui khuaa cheng chuanhnuai lam chuan hmunhim lam panin an in sa seng mek a, hetih lai hian Saihapui ‘K’ pawh a khaw bul Tuichhuahen lui chuan khua arawn chim tawh avangin an inthiar chhuak ve bawk. Ruahtui tam avang hian tuillian in a chim chin sangzel thei dinhmunah ding mahse chhiatna liantham thleng a awm rihlo ni a hriat a ni.

He thil thlengah hian Serlui Bialtu MLA Pu Lalrinsanga Ralte chuan Kolasib Bawrhsap biain a bialchhunga tuilian vanga harsat na tawkte chu a theih ang ang chhawmdawl leh tanpuina tuar a hmalak pui turin a ngen a ni.

***Voicecast***

*Tunhnaia ruahsur tam tak avangin Serlui B Hydel project-a tui tling khawm chu a tam chak hle a, hei hian tuikhuah len zawng leh san zawng ti pung zelin tui chim chin a san zel avang hian Serlui bial chhunga khaw pahnih North Chawnpui leh Saihapui ‘K’-a cheng tuiin a chim theiha awm te chu hmun him lam panin an in sa seng a, tuilian hi a chim chin sang zel mahse tun dinhmunah chhiatna lian tham thleng ala awmlo nia thudawn a ni.*

<><><>

**LESDE MINISTER**

Labour, Employment, Skill Development and Entrepreneurship Department changtu Minister Pu Lalnghinglova Hmar chuan Industrial Training Institute chu kutthemthiam zirna pawimawh a nih avangin changlung zawka thuam a pawimawh tih a sawi.

Nimin khan Labour, Employment, Skill Development and Entrepreneurship (LESDE) Department chuan Departmental Review Meeting neiin LESDE Department hnuaia hmalakna leh hmachhawp bakah hmasawn zel dan tur sawiho a ni a, Pu Lalnghinglova Hmar chuan Department chu midangte hmasawn tir tur annih avangin theitawp chhuah an ngaih thu a sawi a, ITI chu kutthemthiam zirna pawimawh a nih avangin tihchangkan lehzual a tul thu sawiin Mizoram Building & Other Construction Workers Welfare Board lama labour cess tlingkhawm pawh danin a phal chhungah chak zawka hman dan ngaihtuah a ngai tiin hmasawn zel an tum a ti a, kutthemthiamna tih hmasawn bakah eizawna an neih thlenga pui thei turin theitawp chhuah a tul thu a sawi a ni.

Secretary Dr. Lalhriatzuali Ralte pawhin thusawiin Department hnuaia scheme hrang hrang tan helpline neih te leh rampawna thawkte buaipuitu tur Overseas Employment Cell neih te a tul tawh thu sawiin, review meeting atanga hmachhawp awmahte mahni chanpual theuh chak taka bawhzui turin thawktute a chah a ni.

<><><>

**UD&PA MINISTER**

UD&PA Minister Pu K. Sapdanga’n Mizoram sawrkar leh LMC thawhho that a pawimawh thu sawiin LMC hnathawh chu chhuanawm atih thu a sawi.

Nizan khan MINECO Aizawl Sumtual ah UD&PA Minister Pu K. Sapdanga kaihhruainain Lunglei Municipal Council (LMC) area chhunga project hrang hrangte chu UD&PA Department chuan Lunglei Municipal Council hnenah a hlan a, Pu K. Sapdanga chuan LMC chu Budget leh funding lamah harsatna a awm thin chung pawha ten tlo leh tha taka hna an la thawk thei chu a lawmawm atih thu sawiin hmasawna hnathawhte tuang taka a kal zui zel theih nan Department leh LMC te inkarah thawhhona tha awm zel se a duh thu a sawi.

UD&PA Director Pu Jacob Lalawmpuia chuan project inhlan chhawna hriat tur leh zawm turte a sawi zau a. Project hrang hrangte LMC hnuaiah hlan a nih tawh avangin enkawlna leh hmalakna hna te LMC kutah a awm zui tawh dawn thu a sawi a. Hmasawna hnathawhte hlawhtling taka kalpui a nih theih nan inhriatthiam tawna leh thawhhona tha neih a pawimawh thu a sawi bawk.

LMC area chhunga hmasawna ruhrel leh project pawimawh hrang hrang—Solid Waste Management Centre (I & II), LMC Complex (Sazaikawn), Transport Hub (Hrangchalkawn), Multi-Level Car Parking (Thuamluaia Mual), Lungei Park Renovation, Composite Urban Infrastructure leh Storm Drain sakna te chu UD&PA Department atangin LMC kutah hlan chhawn a ni.

<><><>

**UPSC GROOMING SCHEME 2026**

UPSC Grooming Scheme Entrance Examination, 2026 neih zawh taka thlan chhuah zirlai sawm (10) te chu Mizoram Board of School Education Conference Hall, Chaltlang Aizawl-ah Counselling neih pui an ni.

Counseling-ah hian Civil Service Examination lama tawnhriat nei tha mithiam sawm bikte leh MBSE lam hotuten zirlaite leh an nu leh pate hun an hmanpui a, MBSE hotute hnen atangin Scheme kalhmang leh hmalak chhoh dan te leh lawmpuina leh fuihna thu ngaihthlak a ni a. Mithiam sawm bikte atangin an tawnhriat te, Civil Service exam kalphung te, exam hmachhawn tura inbuatsaih dan te, an hnathawh te leh fuihna thute ngaihthlak a ni a. Coaching class kalpui an nih dan tur te leh an zir chhoh dan tur hmelhriattirna neih bawk niin zirlai leh nu leh paten an hlawkpui hle a ni.



**ELECTRONIC VACCINE CARRIER**

SELCO Foundation chuan nimin khan Mizoram sawrkar hnenah Electronic Vaccine Carrier 30 an hlan.

SELCO Foundation thil hlan hi Mizoram sawrkar aiawhin Health Minister Pi Lalrinpuii’n a dawng a, Minister chuan Electronic Vaccine Carrier 30 chu Mamit, Lawngtlai leh Lunglei District-a hman tur ani tiin EVC-te chu Health & Wellness leh Sub-Centre awm lohna hmuna nu leh naupangte tan hri laka himna leh hriselna thlentu a nih ngei a beisei thu a sawi bawk.

Minister chuan Mizoram chu tlangram a nih avangin hmun kilkhawr leh tlawhpawh harsa tak takte a awm thin tih sawiin, EVC chu darkar 35 chhung 2°C–8°C inkarah vaccine-te a vawn that theih avangin, hmun kilkhawr zawk a awmte tan a hun taka vaccine an lak theih nan a tangkai hle dawn a ni a ti a. HPV Vaccine immunization chu state pumah 100.4% lai an hlawhtlin thu a sawi bawk.

SELCO foundation-in Mizoram sawrkar an hlan tak EVC-te hi ken kual awlsam leh zangkhai, solar hmang niin, pakhat hi cheng nuai 1 leh sing 5 man lai a ni.



**Dr K. BEICHHUA**

BJP Mizoram President Dr K. Beichhuuaa’n tun hnaia interview pakhatah Chief Minister Pu Lalduhoma’n Mizoram GST khawn a tlakhniam chhan ah ramchhunga GST khawn tla hniam a puh chu thu dik tawklo a ni a ti.

Dr K. Beichhua chuan Social media account kaltlanga he thu hi sawiin India economy chu Prime Minister Narendra Modi kaihhruaina hnuaia ah a thang nasa hle tiin nimin maiah 7.8% lain a thang chho a ti a, India ram puma GST khawn pawh a sang zel tiin July ah 15.4% lai niin tluklehdingawn a tling hial a ti bawk.

BJP President chuan Mizoram Chief Minister in thudik tâwk loa Indian economy dinhmun chungchang diklo taka a sawi bakah mipui rilru hruai kawi a tum chu an dem takzet a ti a, Mizoram GST khawn tlakhniam nachhan dik tak chu ZPM sum leh pai inrelbawl dan a fel tawk loh vang anih thu a sawi bawk.

<><><>

**MTA**

Mizoram Tipper Association Joint Committee hruaituten Silchar Truck Driver Association-in National Highway-a road block siama hma an la zêl a nih chuan MTA in Mizorama tlawmngai pawl dangte thurualpuiin tha thlah lova hmalak ve an tum thu an sawi.

MTA chuan Silchar Truck Driver Association in August ni 31 atanga nawrh an huaihawta kawng an dang anih chuan Mizorama tlawmngai pawl dangte nen hmalak an tum thu an sawi a, Silchar Truck Driver Association hian tunhnaia an truck driver pui ten Mizoram chhunga harsatna an tawh thin thu sawiin Assam registration truck dan anga Balu phur te chu kawnglakah tidingin mithenkhat tu tih hriatlohte chuan an balu phurh te unload tirin an let leh tir thin nia sawiin thuneitute an hriattir hnuah pawh hmalakna a awm loh avangin hma an la tih an sawi a ni.

He thil thlengah hian Silchar Truck Driver Association chuan Mizoram sawrkar leh Kolasib DC te chu an ngenna bawhzui saka thil awmzia a rang lama chhuichian sak turin an ngen a, an nawrh hunchhung tur hriat nilo mahse Mizoram mamawh bungraw phur motor leh zin veivak phur tu te chu dan an nilo a ni.

<><><>

**MAMIT DC**

The Jute Corporation of India Limited ten an CSR hmanga Mamit District Hospital tana Ambulance an pek chu nimin khan Mamit DC Suvigya S. Chandra chuan damdawiin hnenah a hlan.

DC chuan Mamit District chu dawm kan ngai an nih avangin hamthatna leh duhsakna hrang hrang an dawnte hman tangkaina chang hriat a pawimawh thu sawiin, damlo hmunpui zawk pan ngaite, nu nau nei tur rang leh awlsam zawk a, Damdawiin pan pui an nih theih nana thil tangkai tak nise a duh thu a sawi a ni.

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

**BATTLE OF THE HILLS**

Sports Minister Pu Lalnghinglova Hmar chuan Ban Elha infiamna chu Mizo phurpui chi ani tiin Mizoram Sports Incentive Cash Award dawng thei zingah telh a ni tawh a ti.

Nizana Vanapa Hall-a Mizoram Arm Wrestling Association (MAWA) buatsaih, Mizoram Armswrestling Super Match, 'Battle of the Hills' a hmanpuina ah

he thu hi a sawi a, Pu Lalnghinglova Hmar chuan Mizote thatna Arm Wrestling chuan hmasawn zelin kum 2027 National Games leh kum 2032 Paralympic Games ah telh tum ani tiin infiammi te theihtawp chhuah zel turin duhsakna a hlan a ni.

<><><>

**SC**

Supreme Court chuan NEET paper putru duhloha July ni 20 atanga 25 inkara zirlaiten lungawilohna an lantir tuma FIR thehluh zawng zawngte titawp turin thupek a chhuah. Court chuan ramchhung hmun hrang hranga heng thubuai thehluh zawng zawngte hi bawhzui emaw chhui zui lo tur leh an thubuai te tihtawp tawh anga kalpui vek turin a ti a. Sawrkar laipui, Delhi Police, Bihar, West Bengal, Maharastra leh Assam-a zirlai lungawilohna lantirte laka FIR thehluh zawng zawng chu Supreme Court hian a hnawl sak vek a. State dangah pawh he thupek hi kalpui niin July ni 20 atanga 25 chhunga thil thleng kaihhnawihah FIR thar tumahin thehlut lo turin a hriattir a ni.

<><><>

**PM**

Prime Minister Narendra Modia chuan hlawhtling taka Uzbekistan leh Kyrgyzstan a tlawh hnuah nizan khan India-ah a lo thleng leh tawh.

Nimin khan Prime Minister Narendra Modia chuan Kyrgyzstan khawpui Bishkek-a Sanghai Cooperation Organisation Summit vawi 26 naah thusawiin member-te chu firfiakte chetvelna ti chhe vek turin a sawm a. Pu Modia chuan firfiakte chetvelna hrang hrang suma tanpuinate, mi leh sa an inlak belh dante, leh an inhumhimna thin zawng zawng leh an inthlunzawmna te ti chhe vek turin a sawm a. Firfiakte lakah hmai hnih neia chet a theihloh a ti bawk.

SCO Summit ah hian Bishkek Declaration pawm a ni a. Tunlai khawvela ram venhimna ti derthawng thei thil hrang hrang laka invenhimna turin chak zawka hmalak an remti a ni.

<><><>